



Uunga siunnersuut: Naalakkersuinikkut arlaannaannulluunniit attuumassuteqanngitsunik siunnersui-soqatigiinnik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassar-siornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiisassallutik kiisalu aatsitassarsiornermi pilersaarutit ataasiakkaat siunissaq ungasinnerusoq eqqarsaatigalugu piujuartitsineq tunngavigalugu inuiaqatigiinni ineriartortitsinermik nassata-qarnissaat siuarsaaqataaffigissallugu. Tamanna pillugu siunnersuisoqatigiit Naalakkersuisunut innuttaasunullu inassuteqaasiortassapput.

(Inatsisartunut Ilaasortat Naaja H. Nathanielsen aamma Sara Olsvig, Inuit Ataqtigiit)

Siullermeerneqarnera

Naaja H. Nathanielsenip Sara Olsvigillu siunnersuutaannut Partii Naleqqamiit imatut oqaaseqassaagut.

Siullermik Partii Naleqqamiit isumaqarpugut massakkut aatsitassarsiornerup unikaallaruttorfianni sukumiilluinnartumik Aatsitassanut inatsisitta, tassanilu ilanngullugu small scale tunngavigalugu aatsitassarsiortut sinaakkutissaata aaqqiiffigineqarnissaata, nalilersorluaqqinnissaa atortariaqaripput.

Pisuussutit uumaatsut inuiaqatigiit pigivaat, qulakkeertariaqarparpullu inuiaqatigiit aamma pisuussutiminnik iluanaarnissaat, tamannalu Partii Naleqqamiit isumarput malillugu massakkut inatsimmi qulakkeerneqanngilaq.

Siorna suliffissaaleqineq pillugu partiit arlaliulluta siunnersuusiorpugut, tassanilu Partii Naleqqamiit siuttuuffigisatsinni aatsitassarsiornermut tunngatillugu piunasaqaateqartitsivugut nammineq partiitta anguniagaannut qanittumik. Partii Naleraq imatut aatsitassarsionermi anguniagaqarpoq:

”Nunatta pisuussutai uumassusillit uumaatsullu pisuussutunik piginnittunut, tassalu kalaallinut, iluaqutaanissaat annerpaaq tikillugu anguniarneqartariaqarpoq. Avataaniit tikittut uuliasiorniat A/S-iliortarput iluanaarnissartik qulakkeerniarlugu, tassanilu inuiaat kalaallit piginneqataasutut peqataanissaat qulakkeeqqaneqartariaqarpoq piginneqataassutissat suliamiik suliamut tamatigut nalilersoqqissaarneratigut, aatsitassarsiorfissuarnilu piginneqataassutip 40% missaaniinnissaa minnerpaaffiutittarlugu.”

Tungaviatigullu tamanna anguniarneqartariaqarpoq. Angutserlugulu periusissat assigiinnngissinnaasarput aammalu qanoq tamassumap qulakkeernissaa partiimiit partiimut isummersorfigineqarsinnaavoq, unalu Inuit Ataqtigiit ilaasortaataitanit marluusunit siunnersuut aamma taamaappoq.

Aallartikkattali aatsitassarsiornermut siunnersuutunik arlalinnik Inatsisartuni suliaqareerpugut, Partii Naleqqamiillu isumaqarpugut inatsit allangortinnagu assigiinnngitsunik ilaartuunnassagutsigu annerusumik inuiaqatigiinnut iluanaarutaasinnaannngornissaata qulakkeernissaa qanilliarternaviannngikkippat. Angutserlugulu oqaloqataasinnaavugut aamma uunga siunnersuummut.

Nuuk kangerluani Isukasiani saviminissamik paaaniarlutik akuersissummik pinikuusut London Mining PLC tamatta ilisimalereernikuunnguatsiarpagut, soorlu aamma ilisimaarigippat akiliisinnaajunnaarlutik suliffeqarfik matunikuugaat, piginnittulli nutaat suliaasaq ingerlateqqinniarlugu pisiarinikuugaat. Qularnannngitsumik immaqa killiffiat pinngitsoorneqarsinnaasimassagaluarpoq siunnersuuteqartutuut siunnersuisoqatigiinnik pilersitsisoqarsimassagaluarpat. Tamanna akiuminaappoq, ilimanarsinnaallunili.

Aatsitassarsiornermi inatsimmi piumasaqaatit sorpassuartigut ajunngitsortaqarput aamma aatsitassarsiorfik nungulluni matusussanngorpat aningaasanik saliinissamut atugassanik qularnaarinnissimanissaq ilanngullugu.

Siunnersuisoqatigeeqarpat imaluunniit atsioqatigiinnikkut Naalakkersuisut aatsitassarsortussallu akornanni qulakkeerinntoqarumaartoq akiuminaappoq, sukumiisumilli misissorneqartariaqarluni.

Taamaattumik suliap aappassaaneerneqannginnerani Partii Naleqqamiit aatsitassaqaarnermut ataatsimiititaliamut siunnersuutip innersuunneqarnissaa innersuussutigissavarput.